

А Ж Р И М

(даъво аризасини кўрмасдан қолдириш тўғрисида)

Избоскан тумани**2023 йил 4 август**

Избоскан туманлараро иқтисодий суди судьяси Х.Абдураимов раислигида, судья ёрдамчиси А.Султонов котиблигида, Балиқчи тумани фермер, деҳқон хўжаликлари ва томорқа ер эгалари кенгашининг даъвогар – “Бал Абдужаббор Уролов” фермер хўжалиги манфаатида жавобгар – “SKORTON TEXTIL” масъулияти чекланган жамияти ҳисобидан 225 258 992 сўм асосий қарздорлик ва 9 010 360 сўм пеня ундириш тўғрисидаги даъво аризаси бўйича қўзғатилган иқтисодий ишни Кенгаш вакиллари Н.Тохлибоева (2023 йил 3 июль кунги 93-сонли ишончнома асосида), фермер хўжалиги раҳбари Б.Уролов, жавобгар вакиллари Ж.Махмудов, З.Хошимов (ишончномалар асосида), иштирокида суд биносида очиқ суд мажлисида кўриб чиқиб, қуйидагиларни

А Н И Қ Л А Д И:

Балиқчи тумани фермер, деҳқон хўжаликлари ва томорқа ер эгалари кенгашининг (кейинги ўринларда “Кенгаш” деб юритилади) “Бал Абдужаббор Уролов” фермер хўжалиги манфаатида (кейинги ўринларда “даъвогар” деб юритилади) Избоскан туманлараро иқтисодий судига мурожаат қилиб, жавобгар - “SKORTON TEXTIL” масъулияти чекланган жамияти (кейинги ўринларда “жавобгар” деб юритилади) ҳисобидан 225 258 992 сўм асосий қарздорлик ва 9 010 360 сўм пеня ундиришни сўраган.

Суд мажлисида Кенгаш вакили иштирок этиб, даъвони қаноатлантириб беришни сўради.

Суд мажлисида фермер хўжалиги иштирок этиб, судга ариза билан мурожаат қилиб, даъводан воз кечганлиги сабабли даъво аризасини кўрмасдан қолдиришни сўради.

Суд мажлисида иштирок этган жавобгар вакиллари ҳам суддан даъвогар томонидан даъводан воз кечганлиги сабабли даъво аризасини кўрмасдан қолдирилишини сўради.

Суд даъвогар вакилининг аризасини ва иш ҳужжатларини ўрганиб чиқиб, қуйидагиларга асосан аризани қабул қилишни ва мазкур иқтисодий иш бўйича даъво аризасини кўрмасдан қолдиришни лозим топди.

Ўзбекистон Республикаси Иқтисодий процессуал кодекси (бундан кейин матнда - ИПК)нинг 157-моддаси иккинчи қисмига асосан, даъвогар ишни ҳар қандай инстанция судида кўришда тегишли суд инстанциясида ишни кўриш якуни бўйича чиқариладиган суд ҳужжати қабул қилингунига қадар даъводан тўлиқ ёки қисман воз кечишга ҳақли.

ИПКнинг 50-моддаси учинчи қисмига асосан, давлат органи ва бошқа шахс томонидан даъвогарнинг ҳуқуқларини ҳимоя қилиш мақсадида тақдим



этилган даъво аризасидан (аризасидан) даъвогарнинг (аризачининг) воз кечиши даъво аризасини (аризани) кўрмасдан қолдиришга олиб келади.

Шунингдек, ИПКнинг 107-моддаси 8-бандига кўра, даъвогарнинг манфаатларини кўзлаб прокурор, давлат органи ва бошқа шахс томонидан тақдим этилган даъводан даъвогар воз кечган бўлса суд даъво аризасини кўрмасдан қолдиради.

Мазкур ҳолатда Кенгашнинг фермер хўжалиги манфаатида киритган даъво аризаси бўйича даъводан даъвогар “Бал Абдужаббор Уролов” фермер хўжалиги воз кечган.

Ўзбекистон Республикаси Олий хўжалик суди Пленумининг “Иқтисодий судлар томонидан давлат божи тўғрисидаги қонун ҳужжатларини қўллашнинг айрим масалалари ҳақида” 2008 йил 18 апрелдаги 180-сонли Қарорининг 15-бандига кўра, ишни кўриш даъвони (аризани) кўрмасдан қолдириш тўғрисидаги ажримни чиқариш билан яқунланганида давлат божи қайтарилмайди, тўланмаган давлат божи эса даъвогардан ундирилади, агар у давлат божи тўлашдан озод қилинмаган бўлса.

Суд мазкур иш бўйича “Бал Абдужаббор Уролов” фермер хўжалигининг даъводан воз кечишини ўрганиб, у қонун ҳужжатларига хилоф эмас ҳамда бошқа шахсларнинг ҳуқуқлари ва қонун билан қўриқланадиган манфаатларини бузмайди деб ҳисоблайди.

Қайд этилганларга асосан суд, мазкур даъводан воз кечишни қабул қилишни ва даъво аризасини кўрмасдан қолдиришни, давлат божини эса даъвогар “Бал Абдужаббор Уролов” фермер хўжалигидан ундиришни лозим топади.

Юқорида баён этилганларга асосланиб, ИПКнинг 50, 107, 128, 157, 195, 196-моддаларини қўллаб, суд

А Ж Р И М Қ И Л Д И :

Балиқчи тумани фермер, дехқон хўжаликлари ва томорқа ер эгалари кенгашининг даъвогар – “Бал Абдужаббор Уролов” фермер хўжалиги манфаатида жавобгар – “SKORTON TEXTIL” масъулияти чекланган жамияти ҳисобидан 225 258 992 сўм асосий қарздорлик ва 9 010 360 сўм пеня ундириш тўғрисидаги даъво аризаси бўйича “Бал Абдужаббор Уролов” фермер хўжалигининг даъводан воз кечиш тўғрисидаги аризаси қабул қилинсин.

Балиқчи тумани фермер, дехқон хўжаликлари ва томорқа ер эгалари кенгашининг даъво аризаси кўрмасдан қолдирилсин.

“Бал Абдужаббор Уролов” фермер хўжалиги ҳисобидан Республика бюджетига 4 685 387,04 сўм давлат божи ундирилсин.

Мазкур иш бўйича тўланган 33 000 сўм почта харажати Балиқчи тумани фермер, дехқон хўжаликлари ва томорқа ер эгалари кенгаши зиммасида қолдирилсин.

Ушбу ажримдан норози тараф бир ойлик муддат ичида апелляция тартибида шикоят бериши (протест келтириши) мумкин.



Судья

Х.Абдураимов

Хужжат имзоланган: Абдураимов Хусниддин Камолдинович, 04.08.2023

